

Подобает ведати, яко от сего дне святых и великия Недели Пасхи даже до субботы, часы сице поются. Так же келейно, **вместо утренних молитв и молитв на сон грядущим.**

Молитвами святых отец наших, Господи Иисусе Христе, помилуй нас. Аминь.

тропарь, во глас 5, трижды:

Христос воскресе из мертвых, смертью смерть поправ, и сущим во гробех живот даровав.

таже глаголем трижды:

Воскресение Христово видевше, поклонимся святому Господу Иисусу, Единому Безгрешному. Кресту Твоему поклоняемся, Христе, и святое Воскресение Твое поем и славим. Ты бо еси Бог наш, разве Тебе иного не знаем, имя Твое именуем. Приидите вси вернии, поклонимся святому Христову Воскресению: се бо прииде Крестом радость всему миру. Всегда благословяще Господа, поем Воскресение Его: распятие бо претерпев, смертью смерть разруши.

таже ипакон, глас 4, единощи:

Предварившия утро яже о Марии, и обретиши камень отвален от гроба, слышаху от Ангела: во свете присносущнем Сущаго, с мертвыми что ищите яко человека? Видите гробныя пелены, тецйте и миру проповедите, яко востал Господь, умертвивый смерть, яко есть Сын Бога, спасающаго род человеческий.

таже кондак, глас 8, единощи:

Аще и во гроб снизшел еси, Безсмертне, но адову разрушил еси силу, и воскресл еси яко Победитель, Христе Боже, женам мирносицам вещавый: Радуйтесь!, и Твоим апостолом мир даруяй, падшим подай воскресение.

таже и сей тропарь единощи:

Во гробе плотски, во аде же с душею яко Бог, в рай же с разбойником, и на Престоле был еси, Христе, со Отцем и Духом, вся исполняяй, неописанный.

Слава Отцу и Сыну и Святому Духу:

Яко Живоносец, яко рай краснейший, воистинну и чертога всякаго царскаго показася светлейший, Христе, гроб Твой, источник нашего Воскресения.

И ныне и присно и во веки веков. Аминь:

Вышняго освященное Божественное селение, радуйся: Тобою бо дадеся радость, Богородице, зовущим: благословенна Ты в женах еси, Всенепорочная Владычице.

Господи помилуй (Сорок раз).

Слава Отцу и Сыну и Святому Духу, и ныне и присно, и во веки веков. Аминь:

Честнейшую Херувим и славнейшую без сравнения Серафим, без исления Бога Слова рождшую, сущую Богородицу, Тя величаем.

и пакы глаголем подобне:

Христос воскресе из мертвых, смертью смерть поправ и сущим во гробех живот даровав (трижды).

Господи Иисусе Христе, Сыне Божий, молитв ради Пречистыя Твоея Матере, преподобных и богоносных отец наших и всех святых, помилуй нас. Аминь.